

Convenio de colaboración entre a Consellería de Medio Ambiente, Territorio e Vivenda e a entidade pública empresarial Augas de Galicia para o exercicio das competencias de acondicionamento, mantemento e conservación do entorno do río Mero

MEMORIA XUSTIFICATIVA

1 Antecedentes

O 27 de novembro de 2002 a Consellería de Medio Ambiente, Augas de Galicia e a Confederación Hidrográfica do Norte do Ministerio de Medio Ambiente subscribiron un convenio de colaboración para a execución do “Proxecto de Acondicionamento Hidráulico do río Mero entre a Presa de Cecebre e a súa desembocadura (A Coruña)”.

O convenio enmarcase no ámbito dun plan de restauración hidrolóxico e de protección e rexeneración de canles e enclaves naturais que o Ministerio de Medio Ambiente puxo en marcha e que tiña por obxecto a execución dunha actuación de restauración hidrolóxico-forestal e de recuperación e mellora de distintas áreas incluídas no “Proxecto de Acondicionamento Hidráulico do río Mero entre a Presa de Cecebre e a súa desembocadura (A Coruña)”.

Segundo o convenio, correspondía á Confederación Hidrográfica do Norte a aprobación do proxecto e a execución das obras, que foron financiadas pola dita confederación hidrográfica e por Augas de Galicia.

O convenio establecía unha vixencia de tres anos, podendo ser prorrogado no caso de non ter finalizado as actuacións.

A cláusula oitava do convenio de colaboración preveía que *“unha vez terminada a obra e recibida definitivamente, será entregada para o seu uso público á Consellería de Medio Ambiente da Comunidade Autónoma de Galicia que, a partir deste intre, farase cargo, a todos os efectos, da mesma”*.

O 5 de xullo de 2007 a Confederación Hidrográfica do Norte comunicou á Consellería de Medio Ambiente que o 7 de xuño de 2007 se realizara a recepción das obras obxecto do convenio, manifestando na dita comunicación que a partir da data da recepción resultaba de aplicación a cláusula oitava do convenio.

A Consellería de Medio Ambiente, Territorio e Vivenda é o órgano da Administración da Comunidade Autónoma ao que lle corresponden as competencias e funcións en materia de ambiente, ordenación do territorio e urbanismo, conservación do patrimonio natural, paisaxe e vivenda, conforme o establecido no Estatuto de autonomía para Galicia nos termos sinalados na Constitución española

Augas de Galicia, creada pola Lei 9/2010, de 4 de novembro, de augas de Galicia e regulada polo Decreto 32/2012, do 12 de xaneiro, polo que se aproba o seu estatuto, é unha entidade pública empresarial do sector público autonómico de Galicia, adscrita á Consellería de Infraestruturas e Mobilidade, con personalidade xurídica propia e plena capacidade de obrar para o cumprimento dos seus fins.

De acordo cos apartados b) e d) do artigo 3.3. da citada Lei 9/2010, constitúen obxectivos medioambientais da entidade pública: prever o deterioro do estado de todas as masas de auga, superficiais, subterráneas e das zonas protexidas e, no seu caso, restauralas co obxecto de conseguir o seu bo estado ecolóxico e compatibilizar a xestión dos recursos naturais coa salvagarda da calidade das masas de auga e dos ecosistemas acuáticos.

Na data en que se asinou o convenio estaba en vigor o Decreto 14/2002, do 24 de xaneiro, polo que se establece a estrutura orgánica da Consellería de Medio Ambiente. Este decreto sinalaba que esta consellería era o órgano da Administración da Comunidade Autónoma ao que lle correspondía o exercicio das competencias e funcións que en materia de medio ambiente e conservación da natureza que se establecen nos artigos 27.10.º, 11.º, 15.º e 30.º e 29.4.º do Estatuto de Autonomía e demais normativa de aplicación, en especial na normativa sobre protección ambiental de Galicia.

Segundo este decreto, a Consellería de Medio Ambiente contaba para o desempeño das súas funcións, entre outros órganos directivos, coa Dirección Xeral de Montes e Industrias Forestais, coa Dirección Xeral de Conservación da Natureza e tiña adscrito ao organismo autónomo Augas de Galicia.

Dende o ano 2002, a estrutura orgánica da Xunta de Galicia, foi modificada en distintas ocasións, estando vixente actualmente o Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia, modificado polo Decreto 106/2018, do 4 de outubro.



Segundo este decreto:

- a Consellería de Medio Ambiente, Territorio e Vivenda, conta entre os seus órganos directivos coa Dirección Xeral de Patrimonio Natural, á que segundo o Decreto 42/2019, do 28 de marzo, polo que se establece a súa estrutura orgánica, correspóndenlle as competencias e funcións en materia de conservación, protección, uso sustentable, mellora e restauración do patrimonio natural e da biodiversidade de Galicia e dos seus elementos etnográficos e a súa preservación para as xeracións futuras
- a entidade publica empresarial Augas de Galicia está adscrita á Consellería de Infraestruturas e Mobilidade, que segundo o artigo 1 do Decreto 26/2019, de 7 de marzo, polo que se establece a estrutura orgánica desta consellería, asume as competencias e funcións en materia de augas.
- a Consellería do Medio Rural conta entre os seus órganos directivos coa Dirección Xeral de Ordenación Forestal, á que segundo o Decreto 149/2018, do 5 de decembro, polo que se establece a estrutura orgánica da Consellería do Medio Rural, correspóndenlle as competencias e funcións en materia de política forestal, desenvolvendo as medidas relacionadas coa planificación, ordenación, fomento, mellora da produción e conservación dos recursos forestais.

A Lei 9/2010, do 4 de novembro, de augas de Galicia, no artigo 4 atribúe á Comunidade Autónoma de Galicia competencias en materia de ordenación administrativa, planificación e xestión da auga superficial e subterránea, dos usos e aproveitamentos hidráulicos, así como das obras hidráulicas que non estean cualificadas de interese xeral. E especificamente atribúe a Augas de Galicia, no ámbito da xestión das concas intracomunitarias, as competencias que o ordenamento xurídico vixente en materia de augas atribúe aos organismos de conca.

Así mesmo, o artigo 23 do Real Decreto Legislativo 1/2001, do 20 de xullo, polo que se aproba o texto refundido da Lei de augas, atribúe aos organismos de conca a administración e control do dominio público hidráulico así como o proxecto, a construción e explotación das obras realizadas con cargo aos fondos propios do organismo, e as que lles sexan encomendadas polo Estado.

2 Obxectivos que se pretenden, necesidade da colaboración e razóns de oportunidade

A formalización do convenio ven a clarificar o órgano competente para a conservación e mantemento das obras.



A formalización do convenio resulta necesaria toda vez que, por unha banda, nin a Dirección Xeral de Patrimonio Natural, da Consellería de Medio Ambiente, Territorio e Vivenda, nin a Dirección Xeral de Ordenación Forestal da Consellería do Medio Rural, están a asumir as tarefas propias de conservación e mantemento e, por outra banda, Augas de Galicia xa ven realizando determinadas actuacións de conservación e mantemento das obras indicadas.

O artigo 3 da Lei 40/2015, de 1 de outubro, de Réxime xurídico do Sector Público establece os principios de cooperación, colaboración e coordinación entre as Administracións Públicas.

O artigo 99 da Lei 5/2011, de 30 de setembro, do patrimonio da Comunidade Autónoma de Galicia prevé a posibilidade de que a Administración xeral da Comunidade Autónoma de Galicia e as entidades públicas instrumentais poidan celebrar convenios con outras administracións públicas ou con persoas xurídicas de dereito público ou dereito privado pertencentes ao sector público, co fin de ordenar as relacións de carácter patrimonial entre as mesmas nun determinado ámbito.

Para a tramitación deste convenio tense observado o cumprimento dos requisitos establecidos na Lei 40/2015, do 1 de outubro, de réxime xurídico do sector público.

Santiago de Compostela

A directora de Augas de Galicia

Teresa María Gutiérrez López

(asinado dixitalmente)